

## ■ CONVIVENZA

# Tgi gughegia da vegnir sin visita?

DA VIOLA PFEIFFER\*

**D**acurt è la mamma da mes ami stada sin visita tar nus. Igl è stà detg spontan. Mes ami n'aveva gia in temp betg pli vesì ella e nus n'avevan nagut auter da far, cura ch'ella ha telefonà, ed uschia avain nus gist envidà ella a tschaina.

**N**atiralmain percurschain nus pir suenter in check en frestgera che nus n'avain absolutamain nagut da mangiar en chasa, uschia che nus stuain l'emprim ina giada ir a far cumpras en l'Indian Supermarket per far in flot curry (mia spezialitad).

**S**uenter tschaina fa mia sira amogna da gidar nus a lavar giu, quai che nus acceptain senza opposiziun. Nus n'essan numnadamain omadus betg propi gronds fans da questa occu-paziun (ed atgnamain era da nagina outra lavur dal tegnairchasa). Mintgatant resta la vaschella tschuffa perfin sin il buffet, fin che la dunna da nettegiar vegn. E quella vegn mo mintga duas emnas. Quai vul dir ch'igl ha mintgatant detgas plununas da vaschella, uschia che la dunna da nettegiar n'ha durant las duas uras ch'ella è qua betg propi temp da far insatge auter che lavar giu. Uschia sto la fin finala tuttina in da nus schubregiar la tualetta u far



cun tschitschapulvra (respectivamain laschar far: nus avain uschia in pitschen roboter da tschitschapulvra).

**M**a enavos tar la visita da mia sira. En cuschina guarda ella enturn e dumonda la fin finala mai: «Tgenin da quels sientamauns è per la vaschella e tgenin per ils mauns?» Jau barat ina curta eglia da cun mes ami. Da tge discurra ella? El tira mo las spatlas. Nagin agid. Jau improvisesch. «Oh, quel cun las sdrimas cotschnas è per la vaschella.» «Tiptop.» Ella prenda il sientamauns cotschen e cumenza a sientar.

**J**au sun sincera: fin quest mument n'hai jau betg savì ch'ins dovra dus differents sientamauns per quelas duas chaussas. Jau dovr simplamain il medem per omadus. E sch'insatge croda giun plaun, lura schubregel jau era quai cun quel, met el suenter simplamain en la laschiva e prend in

nov. Sulettamain per la tualetta hai jau outras lumpas, ma sche jau sun sincera atgnamain era pir, dapi che la dunna da nettegiar m'ha fatg attenta a questa malcunvegnientscha.

**I**nsaco sun jau adina stada da l'opiniun che chaussas èn schubras, sch'ins ha lavà ellas – almain cun la maschina. Lura pon ins bain puspè duvrar ellas per tut il dianter. Ma para betg. Quai vala en cas era per la vaschella: jau hai in'amia che ha in'aissa da tagliar speziala per pulaster, e betg mo in'aissa, era in cuntè, ina chazetta ed in sientamauns per sientar giu questa aissa, quest cuntè e questa chazetta.

**U**ss è probabel il mument da remartgar che ni jau ni mes ami n'avain mai gi ina tissientada da vivondas ed ans sentin era uschiglio detg sauns. Jau sun atgnamain era segira che nus (e surtut nossa dunna da nettegiar) tegnain pulit schuber nossa abitaziun – era cun mo ina sort da sientamauns. Tgi che vul examinar quai, po gugent ina giada vegnir sperasvi. Jau cuschin lura curry. Suenter ston ins simplamain gidar a lavar giu. Also, tgi gughegia?

**\*Viola Pfeiffer ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**